

PN aprova orsamentu adisionál millaun \$38-resin ba MPM

DILI, 13 dezembru 2021 (TATOLI)—Parlamentu Nasionál iha debate especialidade ba proposta lei Orsamentu Jerál Estadu (OJE) 2022 aprova orsamentu ho montante inisiál \$42,257,061 ba Ministéiru Petróleu no Minerál (MPM) ho votu a-favór 43, kontra o no abstensaun 15, no aprova mós orsamentu adisionál millaun \$38-resin ba MPM.

“Nune’e Orsamentu Jerál Estadu ba Ministéiru Petróleu no Minerál ho nia alterasaun proposta lima pasa,” Prezidente Parlamentu Nasionál, Deputadu Aniceto Longuinhos Guterres Lopes, deklara iha plenária, segunda ne’e.

Iha proposta número 101 título (Servisu/Órgaun) Ministéiru Petróleu no Minerál (MPM) kategória despeza transferénsia pública ho programa kódiku 401 kona-ba jestaun rekursu petróliferu no minerál, dotasaun inisiál \$41,000.001 iha alterasaun aumenta \$30,000.000, nune’e dotasaun finál kategória sa’e ba \$71,000.001.

Maibé Governu aseita tuir nesesidade hodi redús alterasaun ba millaun \$27,5 no ho orsamentu adisionál ne’e hodi garante funsionamentu MPM iha Timor GAP ba transferénsia pública, hodi kumpre prioridade ba tinan 2022, garante ba kresimentu no sustentabilidade fundu petróleu, redifinisaun no implementasaun estratéjia ba dezvoltamentu petróleu, gás no rekursu minerál iha territóriu nasionál, realizasaun ba estudu no investimentu iha setór *upstream* no *downstream* hosi Timor GAP-EP.

Proposta número 102 ho título ba kategória despeza no programa hanesan ho adisionál millaun \$6 hodi hala’o promosaun ba bloku 18 iha área *onshore* ho *offshore* ne’ebé presiza atividade promosaun lubuk ida inklui viajen ba estranjeiru no munisípiu sia no kontinua monitoriza ho hasai lisensa ba atividade *downstren* no minerál.

Maibé Governu konkorda hodi redús alterasaun fila-fali ba millaun \$2,5.

Proposta número 103 husu adisionál \$300.000 hodi reforsa no aranke ba kompañia mineira.

Ba proposta número 104 título MPM iha kategória saláriu vensimentu ho programa kódiku 510 kona-ba boa-governasaun no jestaun institucionál dotasaun inisiál \$423.258 ho alterasaun aumenta \$100.000, nune’e dotasaun finál sa’e ba \$523.258 no orsamentu adisionál ne’e hodi pagamentu ba kargu xefia dirasaun foun tuir organika ministéiru nian ba sekretáriadu Greater *sunrise* no estabese ba sekretaridadu ba konsellu Governu rejime espezial *Greater Sunrise*.

Proposta número 105 título MPM kategória bens no servisu ho programa kódiku 501 boa-governasaun no jestaun institucionál, dotasaun inisiál \$433.719 no alterasaun aumenta \$9,963.842 nune’e dotasaun finál sa’e ba \$10,397.561 no adisionál ne’e hodi instalasaun arandamentu no akizisaun ba futuro instalasaun hosi MPM no instituisaun sira.

Proposta hirak ne’e mai hosi Maria Angélica Rangel da Cruz hosi (Fretilin), Antoninho Bianco (Fretilin), António da Conceção (PD) ho Maria Angelica Sarmento (PLP).

Ho aprovasaun orsamentu adisionál ne’e no orsamentu inisiál sei iha alterasaun aumenta OJE 2022 ba MPM.

Ministéiru Petróleu no Minerál prevee \$42,257,061 hodi aloka ba saláriu vensimentu \$453,702, bens servisu \$803,358, transferénsia pública \$41,000,001, kapitál menór no kapitál dezvoltamentu laiha.

Hosi orsamentu ne’e sei finansia programa rua, sub-programa walu no atividade 25.

Progama jestaun rekursu petrólifeira no mina-rai prevee \$41,400,084 no programa boa-governasaun no jestaun institucionál prevee \$856,977.